



Siunnersuut uunga: Inatsisartut inatsisaat nr. xx ulloq xx xxxx Aatsitassat pillugit ingerlatallu tamatumunnga pingaarutillit pillugit inatsisartut inatsisaannut nr. 7, 7. december 2009-immersoq allannguutissamut tunngasoq (aatsitassat pillugit inatsit)
(Inuussutissarsiornermut Aatsitassanullu Naalakkersuisoq)
(Siullermeenera)

Demokraatini pingaarnerusutigut saqqummiunneqartoq iluarisimaarparput, taamaattorli oqaaseqaateqassaagut neriulluta Aatsitassat pillugit ataatsimiititaliap eqqarsaatiminut ilanngukkumaarai.

Tusarniaavigineqartutulli – soorlu Kalaallit Nunaanni Sulisitsisut Peqatigiiffiattut aamma WWF Verdensnaturfondenit – isumaqarpugut sapaatip akunnerini arfineq-pingasuni tusarniaaneq ilaatigut sivikippallaaluatsiartoq. Nalunngilarput sapaatip akunnerini arfineq-pingasuni tusarniaasaneq Danmarkimi ileqqusoq, allarpassuartigulli soorlu taamaattoq aamma mianersuutigissavarput nunami maani danskit pissusaat maliinnartassannginnatsigit. Assigiinngissummik taasilaaginnarniarlunga, kattuffiit maani nunami ingerlatsisut, kattuffittut Danmarkimi ingerlatsisutulli sulisoqartiginngillat. Taamaattumik piffissaq sivisunerusoq atorlugu atortut misissoqqaarneqartariaqartarput. Demokraatini taamaattumik siunnersuutigissavarput tusarniaanermut atatillugu piffissaliunneqartartoq sapaatip akunnerinut 12-nut sivitsorneqassasoq. Tamatumunngali atatillugu ataatsimiititaliap tusarniaaffissat naleqquttut attavigisariaqarpai oqaloqatigiinnikkullu tusarniaanermut atatillugu piffissaliunneqartartoq aalajangersarlugu.

Aningaasaateqarfiliariniarneqartutullu eqqarsaat pillugu Demokraatini isumaqarpugut isumassarsiatsialaasoq, taamaakkaluatorli isumaqarpugut itisilerneqartariaqartoq soorlu makkununnga tunngatillugu:



Aningaasaateqarfik Landskarsimiit ukiumut qassinik immerneqartassava?

Naalakkersuisut allakkaluarput ukiumiit ukiumut aningaasaliissutaasartussat nikerarumaartut apeqqutaalluni suliniutit qassit tusarniutigineqassanersut. Tassani Demokraatini isumaqarpugut naleqqunnerussasoq Aningaasanut Inatsit aqqutigalugu ukiut tamaasa aalajangersimasut aningaasaliissutigineqartartuuppata aamma isumaqarpugut aningaasaliissutit atorneqanngitsuussagaluarpata aningaasaateqarfimmii ginnartassasut ukiullu tulliani atorneqarlutik.

**Kiap aningaasaateqarfik aqussavaa aamma kiap aalajangertassavaa,
aningaasaateqarfimmiit kikkut aningaasaliiffigineqartassanersut?**

Tamanna qitiulluinnartussaavoq, Aningaasaateqarfik iluanaaruteqartartussaannngilaq taamaattumik ilaannikkut qinnuteqaatinik itigartitsisariaqartartussaavoq. Aamma imaatannaavoq qinnuteqartut ”inussiarnisaartut” sallinneqaratarsinnaasut qinnuteqartunut isornartorsiuerpalaartunut naleqqiullugit.

Taamatut oqaaseqarluta siunnersuut Aatsitassanut Ataatsimiititaliamut innersuupparput.